

Ilanngussaqq S



INATSISARTUT

**Aningaasaqarnermut, Aatsitassanut
Nunanullu Allanut Naalakkersuisoq**

Ulloq: 15. november 2015

J.nr.: 01.31.11-00015

**Aningaasaqarnermut Akileraartarnermullu Ataatsimiititaliamit ataasinngornermi
ulloq 16. november 2015, nal. 12.00 ataatsimiittarfik 1-imi siunersiorneqarnissamut
aggeqqusissut.**

2016-imi aningaasanut inatsisissatut siunnersuut pillugu Inatsisartut suleriaasianni § 19 naapertorlugu siunersiorneqarnissamut Aningaasaqarnermut, Aatsitassanut Nunanullu Allanut Naalakkersuisoq Aningaasaqarnermut Akileraartarnermullu Ataatsimiititaliamit matumuuna aggersarneqarpoq. (UKA 2015/7).

Aningaasaqarnermut Ataatsimiititaliap oqaaseqaatai apeqqutaalu:

Aningaasaqarnermut Ataatsimiititaliap 2016-imi aningaasanut inatsisissatut siunnersuummut ilassutitut apeqqutai oqaaseqaataalu matumuuna nassiuuneqarput. Utoqqalinersiutissanut akiliutinik akileraarusiinissap siuartinneqarnissaanik pilersaarutit pillugit AK-mit, NPK-mit, PPK-mit, IMAK-imit aammalu ASG-mit sinniisunik Aningaasaqarnermut Ataatsimiititaliap ataatsimeeqateqarnera apeqqutinut pingaarnertut tunngavigineqarpoq. Paasissutissat pissarsiarisani ataatsimiititaliap ilannguppai tamannalu tunngavigalugu makku apeqqutigissallugit:

Sulisartut peqatigiiffiisa isumakuluutigisaat Naalakkersuisunit ataatsimut isigalugu qanoq isumaqarfigneqarpat?

Inummut ilanngaati atorineqanngitsup akileraarutitigut nalingata amerlaqataanik ukiumoor-tumik akileraarutitik naatsorsuinermi ukiumut ataasiarluni tunniussinikkut inuit inummut ilanngaatiminnik atuisinnaanngitsut annaasaqaateqartinneqannginnissaat Naalakkersuisunit pilersaarutigineqarmat eqqorpa? Taamaassimappat: taamatut aaqqiineq soraarnerussutisia-qartut ataasiakkaat ukiup ingerlanerani tigoriaannarnik aningaasaqarnerannut pitsaanngit-sumik sunniuteqarsinnaasorinarpoq – tamatumunnga Naalakkersuisut qanoq oqaaseqaat-tissaqarpat?

Akileraarutitigut ilanngaati atorineqanngitsut soraarnerussutisiaqartunut ataasiakkaanut qaammammut 2000 kronit missaannik naleqartussatut sulisartut peqatigiiffiisa isumaqar-nerat Naalakkersuisunit isumaqatigineqarpat?

Aaqqissuusseqqinnissaq innuttaasunut, kommunitut Namminersorlutillu Oqartussanut allaf-fissornikkut atoruminartunngortinneqarnissaa Naalakkersuisunit qanoq sulissutigineqarpat?

Soraarnerussutisiaqalersut nunatsinnik qimatsisut ullumikkut akileraarutitigut isertitassara-luatsinnik qanoq amerlatigisunik annaasaqaatigisarpagut? Nuuttoqarneratigut inuiaqatigiit

aningaasartuutigisassaralui qanoq amerlatigisut sipaarutigineqartarnerannut tamanna peqatigisaanik sanilliunneqarsimava?

Akilerarusiineq siuartinneqarpat soraarninngornissap tungaanut piffissaq suliffiusoq tamaat isigalugu soraarnerussutisiaqartunit nunatsinniiginnartunit ataasiakkaanit akileraarutitigut isertitassanik annertuunik inuiaqatigiit annaasaqarnissaannik Deloitte naatsorsuina Naa-lakkersuisunit eqqornerarneqarsinnaava?

Utoqqalinersiutissanut akiliutinik akilerarusiinissap siuartinneqarnissaanik pilersaarutit piviusunngortinneqarpata tamatuma nunatta karsianut, inuiaqatigiinnut soraarnerussutisiaqartunullu ataasiakkaanut iluanaarutaanissaa Naalakkersuisunit aalajangiusimaneqarpa?

Soraarnerussutisiaqartunut maleruagassanik allannguinermi kingunerisassanik naatsorsuinerit pillugit allakkiaq Deloittemit suliarineqartoq isummerfigeqqullugu Naalakkersuisut qinuigineqarput. Pingaartumik takussutissiat sisamat allaaserineqartut naliliiffigineqarnissaat matumalu kingulianiittut akineqarnissaat kissaatigineqarpoq:

- Soraarnerussutisiaqalernissamut aqqissuussinnermut akiliutinit akileraarutit siunissami ilanngaatigineqarsinnaassappat?
- PAL-akileraarutit atorunnaassappat maleruagassat nutaat atuutilerpata?


Maleruagassat nutaat atuutilernerisa kingorna sulisussarsiortarnermut sulisunillu sulisoriniinnarniartarnermut kingunerisassat pillugit Naalakkersuisut qanoq isumaliuteqarpat?

Naalakkersuisumik siunersiuinermini allanik aamma apeqquaqarnissani ataatsimiititaliap naatsorsuutigaa.

Ataatsimiititaliap Naalakkersuisumik siunersiuinerata Naalakkersuisup ataatsimiititaliallu akornanni pingaarnersiulluni tulleriiaarinerit anguniakkallu pillugit naalakkersuinerimut tungasumik oqaloqatigiinnertut sapinngisamik iluseqartinneqartarnissaa Aningaasaqarnermut Ataatsimiititaliamit anguniarneqarpoq. Taamatut oqallinneq ammasumik oqallinnertut sapinngisamik ingerlanneqassaaq.

Kiisalu apeqqutit siuliani allassimasut pillugit allakkiamik kalaallisut danskisullu ataatsimiititaliap Naalakkersuisumik siunersiuineranut atatillugu pissarsisinneqarnissani ataatsimiititaliap kissaatigaa. Allakkiap kingusinnerpaamik ataatsimiititaliap Naalakkersuisumik siunersiuinerata kinguninngua uunga nassiunneqarnissaa qinnutigineqarpoq: sakkak@ina.gl. Allakkiaq ataatsimiititaliap Naalakkersuisumik siunersiuineranut nassarneqarpat atornerpallu taassuma nuutinnera ataatsimiititaliap Naalakkersuisumik siunersiuinerata aallartinnerani ataatsimiititaliap oqalutnaanut ataatsimiititaliallu allattaanut tunniuteqquneqarpoq.

Med venlig hilsen


Jens Immanuelson
Formand for Finans- og Skatteudvalget